

四庫全書

史部

欽定四庫全書

史部

浙江通志卷二百六十六

詳校官給事中臣戴璐

檢討臣德生覆勘

總校官編修臣倉聖脉

校對官中書臣李奎

謄錄監生臣馮士新

欽定四庫全書

浙江通志卷二百六十六

藝文八

碑

龍井題名

宋秦觀

元豐二年中秋後一日余自吳興道中東還會稽龍井有辨才大師以書邀余入山比出郭日已夕航湖至普寧遇道人參寥問龍井所遺監輿則曰以不時至去矣

是夕天宇開霽林間月明可數毫髮遂棄舟從參寥策
杖竝湖而行出雷峰度南屏濯足於惠因澗入靈石塢
得支徑上風篁嶺憩於龍井亭酌泉據石而飲之自普
寧經佛寺十五皆寂不聞人聲道傍廬舍或燈火隱顯
草木深鬱流水上激悲鳴殆非人間境行二鼓矣始至
壽聖院謁辨才於潮音堂明日乃還

嚴州烏龍廣濟廟碑

宋陸游

山川之祀自虞書以來見於載籍與天地宗廟竝或謂

山川興雲雨澤枯槁宜在秩祀非必有神主之以予考之殆不然維嶽降神生甫及申山川之神降而為人與人死而為山川之神一也豈幸而見於經則可信後世則舉不可信耶柳宗元死為羅池之神其傳甚怪而韓文公實之張路斯自人為龍廟於潁上其傳尤怪而蘇文忠公實之蓋二神者所傳雖不可知而水旱之禱卓乎偉哉不可泯沒則二公亦不得而揜也予適蜀見李冰張惡子廟於離堆梓潼之山皆血食千載非獨世未

有疑者蓋其靈響暴著亦有不容置疑者矣嚴州烏龍山廣濟廟之神曰五顯仁安靈應昭惠王舊碑以為唐貞觀中人姓邵氏所記甚詳雖幽顯殊隔不可盡質然神靈動人如羅池變化不測如潁上歷數百年未常少替而朝廷之所褒顯吏民之所奉事亦猶一日此烏可以幸得哉至於紹興辛未東海之師羣見巨人皆長丈餘戈戟麾旄出沒烟雲間則相告曰烏龍神兵至矣或降而遁去無敢枝梧者是又與東晉八公山及慶曆嘉

嶺神之事相埒然彼皆在近境而此獨見於山海阻絕
數千里之外豈不尤異也哉不得韓蘇之文以侈大其
傳而邦人進士沈奐顧以屬筆於某辭卑事偉有足恨
者乃作迎送神詩一章使并刻之寶慶元年十月甲子
也其辭曰

王之生兮值唐初基龍翔於天兮英雄是資獨沉草萊
兮默不見施巉然萬仞兮胸中之奇使得小試兮冒白
刃而褰朱旗丈夫戰死兮固亦其宜死於不遭兮精神

曷歸王亦何懟兮人則為悲烏龍之山兮跨空巍巍築
傑屋兮奉祠釀桂兮羞芝彈筦篳兮吹參差王捨斯民
兮逝何之錫以澤兮燕及惇嫠歲屢豐兮長無凶饑擁
羽蓋兮駕玉螭時節來享兮民之依國有征誅兮克相
王師長戈大纛兮肅肅陰威平河雒兮前功弗隳隆名
顯爵兮永世有辭

洞霄宮碑

宋陸游

造化之初昆侖旁薄一氣既分天積氣於上地積塊於

下明為日月幽為鬼神聚為山嶽海瀆散為萬物萬物之最靈為人人之最靈為聖哲為仙真而道為天地萬物之宗幽明鉅細之統此伏羲黃帝老子所以握乾坤司變化也其書為易六十四卦道德五千言陰符西昇度人生神之經列禦寇莊周關喜之書其學者必謝去世俗練精積神棲於名山喬岳略與浮屠氏同而篤於父子之親君臣之義與堯舜周公孔子遺書無異也臨安府洞霄宮舊名天柱觀在大滌洞天之下蓋學黃老

者之所廬其來久矣至我宋遂與嵩山崇福宮獨為天下宮觀之首以寵輔相大臣之去位者亦有以提舉洞霄召拜左相者則其地望之重殆與昭應景靈醴泉萬壽太乙神霄寶籙為比它莫敢望在真宗皇帝時始制詔改宮名賜金寶牌又賜仁和縣田十有五頃奉齋醮悉除其租賦至政和間宮以厯歲久穿壞漫漶徽宗皇帝降度牒三百命兩浙轉運司復興葺之歲度童子一人為道士建炎中又廢於兵火高宗皇帝中興大業聞

之當宁太息乃紹興二十五年以皇太后之命建昊天
殿鐘樓經閣表以崇閎繚以修廡費出慈寧梓匠工役
具於修內步軍司中使臨護犒賜踵至既不以命有司
而山麓之民亦晏然不知有役一旦告成金碧之麗光
照林谷鐘磬之作聲摩雲霄見者疑其天降地涌而神
運鬼輸也可謂盛矣及上脫屣萬機順神物表遂以乾
道二年自德壽宮行幸山中駐蹕累日勅大官進蔬膳
御翰墨書度人經以賜自有天地卽有此山殊尤之迹

未有若此者慶元六年九月葆光大師宮都監潘三華與知宮事高守中同知宮事丘居仁以告山陰陸某曰願有紀以為無窮之傳某以疾未能屬稿後三年同知宮事王思明與其徒李知柔杭濤江入東繼以請乃叙載其本末如此且為之銘曰

在宋祥符帝錫之書乃作昭應比隆義圖元豐景靈列聖攸居元祐上清以祝帝儲棟宇煌煌煥於天衢徽祖神霄誕彌九區迨我高皇東巡於吳睠言天柱鎮茲行

都警蹕來臨神明翊扶乃御幄殿穆清齋居天日下照
雨露普濡迨今遺民注望屬車三聖嗣興光紹聖謨千
礎之宮騫騰太虛寶磬鴻鐘震於江湖肆作頌詩用紀
絕殊

施氏節行碑

宋汪藻

孺人施氏四明人故府君周公諱良史之妻故宣德郎
贈少師諱弁之母今台之寧海縣東四十里有魯介於
數山之間清溪周其前大海環其外水石參錯桑麻雜

植其中多周氏居蓋其故第也施氏於四明為望族孺人有容色性行其家慎擇所配時府君雖不事官學而以能文稱居鄉慷慨有器度喜周給人頗推長老故施氏以歸之周之先嘗縱大舶出海上府君至府不肯離其家納孺人之明年侍其父適日本國去二月而生少師後七年而府君哀訃至少師生府君既不及見而孺人年二十二孺居家貧其父母欲奪而嫁之毅然守志不可回先此閭里未知讀書而孺人始教其子有憐之

者則曰莫若使田富貴焉可必有誦之者則曰是見錢
遲其窮可立待也孺人則自信不疑而教之愈篤乃遣
就舅家求良師友以訓誨之少師少苦瘡瘍累年不能
療孺人親自撫視至達旦不寐方是時家惟四壁而孺
人一寡女子倚少師為命而少師又多病人莫不為孺
人危之少師每學於他郡或馳赴京師行之日飯素禱
於家俟其還無恙乃為肉食自學以至仕裝橐悉自辦
不取諸隣里至鬻衣奩以資之有賓客至必親為之執

龔具食無少倦故少師益得以結賢士大夫就成其業
年十八薦於鄉三薦登進士第先是台州舉進士者曠
歲不得一人至少師而以文章取高第於是乃知孺人
為善教子也嘉祐六年少師釋褐主越州會稽簿遷建
之松溪婺之武義黃之黃陂三縣令得以祿及其親者
十有九年孺人以元豐三年七月初五日卒於黃陂之
官舍享年七十有四後十三年宣德郎卒於官諸孫始
遷孺人之柩與少師葬於江寧府上元縣金陵鄉紫金

嶺政和三年冬孫炳煒援元圭霈恩叙孺人起家本末
乞封於朝廷朝廷審其不誣加以今號迺降訓詞曰朕
荷天景貺嘉與宇內共承茲休汝胚胎吉祥慶鍾來裔
二孫瀝懇祈渙異恩朕方篤孝治以一天下錫此命書
其克歆享嗚呼孺人夙有淑德中外所知鬱而不彰存
歿為恨一旦朝廷恩逮九泉發徽音於數十載之後命
下之日聞者榮之孺人性剛動有法度接宗族鄉里以
和孝聞飭身儉約不妄嫺居五十餘年未嘗出閨閣而

家悉自主之不以累其子使得悉志於學洎少師登第
孺人年五十六矣猶教諸孫疊疊不已而炳燁最早被
誨育以故同年登第炳任左中大夫知瓊州軍州事燁
任右中大夫知汾州軍州事炤瓊燦燿皆舉進士炬右
迪功郎池州青陽縣主簿曾孫道右承議郎知化州軍
州事造右朝請大夫知泉州軍州事萃文林郎撫州司
士曹事萃右從事郎真州六合主簿萃右承直郎監杭
州軍資庫兩浙東路安撫準備差使庠右迪功郎建州

松溪縣尉綦右從事郎監潭州南岳廟元孫彭右從事
郎黃州軍事判官彤彰之美竝右迪功郎其餘舉進士
者又二十餘人源深流遠子孫誥誥久而益盛實由孺
人起艱難守節義慨然保育其孤以致今日异哉孺人
生有偉節沒有榮聞刊之琬琰垂之簡冊可以勸慈母
而勵節婦矣然不得鴻儒大筆表千載殊特之遇則埋
光泉壤何以詔天下後世是用備述孺人顯著之迹與
夫宗族之景仰稱道者以俟異時史氏之所採擇慶元

二年春三月

帝禹廟碑

元 鄧文原

至大辛亥紹興路重修帝禹廟成江浙行中書省平章政事臣某等遣使驛聞請紀其事鑱諸樂石而以命臣文原制曰可顧臣愚陋嘗待罪詞林今又職司儒校敢不對揚丕顯式昭祀垂憲來今謹按史載帝卽位會諸侯江南計功而崩因葬焉其事與禮記言虞帝南巡葬蒼梧者皆謂相傳已久至於封泰山禪會稽則尤為

後世侈功好大者之論而非聖人崇德務本意也嘗以
五服計其道里遐邇則會稽實在要荒之外先王省方
肆覲政教是敷非若馭八駿樂觀游除道周衛而勤民
於遠然帝自肇功疏鑿告成錫圭躬膺厯數年逾百歲
矣猶不肯一日自暇逸以居於萬民之上則夫子所謂
有天下而不與者豈非萬世之大訓哉厥初巨浸稽天
民用昏墊就任已溺懋於奮庸天啟聖仁聲律身度勦
躬胝胝以宣地利以奠民極功施無窮考禮報本匪越

人所私爰自少康之庶子無餘始封而命祀蓋少康距
帝僅五世嬰時投艱復修墜緒一成一旅祀夏配天不
失舊物繫帝之德足以繫屬天下而庶子無餘亦克昨
於東土世席休光以及周之末季凡越之人羣居耕鑿
服習聲教邇原而上曷可食息忘也矧觀其因山之制
而遺衣服藏焉歷世推崇或著禎祥神茲顧享皇元受
命義周仁洽綏定幅員稽古版圖貢輸則在昔九州區
域止及海內職方之大軼古無倫追惟有夏治格幽明

山川鬼神壹是寧謚列聖繼承用弘茲道誕降璽書凡
在祀典者命有司肅修時祭棟宇傾圯官為繕完若江
浙所理聖王之祀宜莫先會稽焉戊申歲越土荐饑疾
癘仍臻民多流殍臣某以季冬來領郡事慨然曰古者
二千石期以共理當為民省憂吾其敢怠忽明年春白
於宰臣凡荒政若干事既得請還謁祠下周視梁榱風
雨歛壓黻冕弗治丹雘漫漶先是宋政和間卽廟為觀
邇年更為寺歲侵視蔭百廢莫興乃首議復廟田之私

質於民者以贍衆鳩工充其傭役惟時鉏荒斧堅民士
競勸礱石以楹陶甕以甃庭觀嚴敞殿廡翼衛若帝臨
止川谷賁輝以帥府命給中統楮幣二百七十一定有
奇是役之興庶幾乎知成民而後致力於神者矣竊惟
帝之平水土也九賦旣均又曰六府三事以示天下萬
世治道之本獨洪範九疇未嘗為虞帝敷陳其說後千
有餘年箕子始以為武王告使箕子蒙難而不獲信其
志又無武王者興則九疇將遂堙而無傳乎自夏歷商

孰傳之而至箕子其事遠莫可考世知帝功與天地並
而洪範九疇鮮有能研精理奧究諸力行者使其書徒
以言語傳漢儒旁摭庶微推致五行其言非不較著明
甚而先王綜理天人之奧亦已微矣八卦九疇道相經
緯天所以畀聖王夫豈偶然哉聖上纘承大寶丕建皇
極中外大臣務肩忠蓋謨協贊襄蓋將挈斯世而躋之
三王之盛神人具孚歲則順成慶浹華裔惟帝降靈茲
土嘉猷德馨亦永永億萬年無斁臣謹稽首再拜而為

之詩詩曰

淝河之東有山鬱蒼鎮於南土夷視崇岡昔帝會同圭
璧斯皇翩其颺馭若帝陟方若彼橋山弓劍是藏維是
橫流潰潰懷襄燥川靜谷成賦定疆帝躬菲惡俾民樂
康鑄鼎象列謹訓範防功加九有道尊百王世嚴秩祀
登薦肅將牧臣有惕顧視榛荒乃堂乃構邃宇周牆吉
蠲來享雲旆龍章繫帝贊育時厥雨暘物消疵癘歲詠
茨梁永祐皇圖儲慶發祥卽山勒銘德遠彌光

北嶺將軍廟碑

明劉基

諸暨東北百里為蕭山其山曰北幹浙水帶其陰湘湖
匯其陽東望會稽至於大海日之所出其上為星紀婺
女之辰故神甚靈能祛疫癘作雲雨人有所必應為立
廟於山尊其神曰北嶺將軍歲祠焉宋徽宗時方臘反
睦州入杭具舟將渡江吏民大懼相率禱於神比寇至
有風逆其舟且見甲士列岸上乃不敢渡寇平知越州
劉𡔷上其事於朝賜額曰武佑廟後封顯應侯再封靈

順顯應侯至正十二年妖賊入江浙烽火通於蕭山百姓驚竄市井皆空主簿趙君某至縣甫八日即自往西興募民備禦而江上守兵甚寡弱無賴子競起為刼應賊衆洵懼君卜於神神許吉衆心稍安君乃遣人捕為刼者悉誅之有自賊中來言賊欲攻浙東見江岸列甲卒旗幟以故畏憚無東心賊退邑人皆德趙君趙君曰吁茲惟神之功予何庸焉明年大旱君往禱輒得雨衆益信神之靈而大敬趙君之能以誠感神也廟在山之

岡歲久朽壞惟神所居室獨存君念無以報神貺乃以
其俸錢新廟邑人大喜爭助十有五年春廟成為堂三
間三門兩廊像設器用無不備惟所存堂仍其舊繚以
垣墉甃以瓦石植以嘉木丹堊輝映吏民承祀益虔三
月壬寅予自杭還越過蕭山趙君請記按祭法能禦災
捍患則祀之今神能降雨澤蘇枯槁又陰力却賊以
保全民物所謂禦災捍患孰有大於此哉趙君愛其民
能敬事神而獲祐可嘉也予喜而序其事復為之歌俾

祀神焉其詞曰

青山兮幽幽綠蘿含烟兮樹木稠望夫君兮悵悠悠巖
阿寂寥兮使我心愁雷為車兮雲為馬輕霞動兮江色
赭神之來兮風振野吹竹兮彈絲女巫舞兮紛陸離莫
芳醴兮薦潔粢留靈修兮牢純禧驅魃蠱兮逐狼虎弭
毒沴兮時暘雨禾麻成兮息桴鼓物既脩兮禮無愆和
熙洽兮洞淵元為城為堡兮式恒且堅保佑我民兮樂
以永年

處州分元帥府同知副都元帥舒穆魯公德政碑

明
劉 基

至正十六年季春予自杭歸處父老率子弟遮道言分
元帥府同知副都元帥舒穆魯公政曰往微公吾聚為
墟今微公吾屬為莠生我者天而活我者公君其知乎
曰然夏五月豪酋納款父老又率子弟造於庭曰舒穆魯
公邦家之干城民之父母也父母鞠子罔不殫厥誠厥
子雖冥鮮不念覆育恩惟公有大造於我州曷以報公

願繪像於祠且勒石紀功用示於州子孫弗忘請為之
文予謝弗能父老復進曰君以丞相命布宣天子威德
既協於遠人旌庸錄勲達丞相心以勸後人時惟至公
予弗敢辭按公姓舒穆魯氏名宜孫舊為契丹人其先御
史大夫以黑軍助世祖皇帝滅金四世祖昭毅大將軍
受命南伐克襄樊定爵三品為沿海萬戶佩虎符鎮處
婺由是居江南好讀書工文章元統中襲爵鎮守處州
大得軍民心數歲以爵讓於弟而退處天台山中十一

年福建妖賊入龍泉處婺大震憲司趣起公征討公至
龍泉募鄉兵擊賊走之未幾賊復入慶元公進屯查田
使人購其徒為應賊遂敗公乘勝掩擊俘斬千計遂復
慶元進攻建寧之松溪政和皆克之處州平公還歸天
台十四年海賊復叛行省憲司以副元帥起公分府台
州公辭不得乃命鄉民作保伍團結扼要害賊不敢登
岸聚糧訓兵以圖進討夏六月朝廷用舊議立巡海道
官防賊賊請降率其屬往衛漕運妖人黃草堂扇動黃

巖民以報讐為名聚眾搆亂公收其渠酋六人斬之餘
黨皆散台州行省又檄公分府處州時處屬縣皆有賊
松陽遂昌在上游去郡最近冬十月公率師進討至寶
定而黃壇大出焚民居火照山谷公分兵守寶定自將
麾下還城賊已薄河津欲渡先是沿海軍悉發往江東
城中留者不滿數百又大半老弱公夜部分居民丁壯
出拒戰斬不用命者三人眾乃齊奮賊不敢渡時沿海
軍有自江東逃歸者六十餘人公召謂曰汝輩能破賊

吾當原汝罪皆拜曰諾即渡水擊賊賊敗走明日退去處舊有城壞不修遺址蕪沒會縉雲叛從賊焚婺之永康及台之仙居於是處州四面戒嚴議浚渠築城而倉庫盡空晝夜經畫勸勉商賈大家和集其民俾效力輸貲咸無違審勢相方商工度材公悉親之官吏左右無容私由是雖勞無怨者義兵部長吳成帥衆討縉雲賊中途不進大掠民財以歸謀亂城中公測其意即召與計事縛斬之捕其黨則皆授兵給號矣民大驚以為

神十有二月公所募義士合擊松陽賊大破之殺其酋
餘衆乞降松陽遂昌悉平予以行省檄與公同議招緝
事比至而公處置已各得其當悉遵公行於是七縣豪
酋相繼納款人謂公生太平時與縉紳為文墨交彬彬
儒者也及其臨事遇變則智勇奮發運不失機撫循士
民則仁慈宣弟惠無不及可謂有用之奇才矣觀其鎮
一州未及期月而功效若是使得制方面專且久盜賊
何足平哉予既敬公德又重父老請於是述輿情而頌

之頌曰

維水在山愈久彌長維德在人愈遠彌光公載世勲來
鎮一方佩符桓桓出師洸洸謀先鬼神雷行電翔鋒旗
所指百怪走藏既剪我棘爰固我疆風雨我廬公樹之
牆雪霜我膚公披之裳晨昏起居婦拜兒鰥有聚弗睽
公賜溥將民愚而靈羣祝孔祥祝公於天錫公壽昌如
川源源如岳蔣蔣於千億年悠哉勿忘

浦陽深溪王氏義門碑銘

明宗 濂

欽定四庫全書

卷二百六十六

浦陽於婺為山邑唐天寶末始割義烏蘭谿富陽三縣地置邑人生其中樸茂淳質力農務本恥華言偽行陳文毅公盛稱書傳所載禮義之俗殆不是過其言信矣梁貞明初縣人何千齡四代同居宋淳熙中鍾宅亦至三世二氏之間沖素處士鄭綺奮然興之教子孫無別大而食志確見凝尤非二氏所及六傳至文嗣而家益昌元至大間旌其門閭力役之征無有所與宋元二朝國史皆立傳殆今歷十世踰二百五十春秋矣深溪王

氏出烏傷鳳林有諱萬者字處一擢宋嘉定癸未進士
第立朝謇諤凜然不可犯僉壬為之斂跡終官太常少
卿謚忠惠少卿之弟爰三傳至某生二子澄汶澄以忠
厚為家州里之無告者給之人戴之不啻父兄瀕終集
衆言曰汝曹能合族如鄭氏吾無憾矣言訖而逝澄三
子子覺子麟子偉子麟為汶後子覺五子應念舉慶聰
子麟一子憲子偉二子懃恩而應之伯仲又各生子踰
二十人子覺與子麟合謀召子姓謂曰一體之分散為

九族痒疴疾痛舉切於吾身收族聚居謂之惇本離宗
是為乖義今吾家相傳四葉矣和孺之樂雖殷管攝之
計未建父有遺言欲法鄭氏鄭氏與吾有連其成規具
在吾將損益而行之何如於是應念帥諸弟踊躍承命
請參定家則一卷遵之馭家之禮質文兼至應物之務
內外齊飭薰蒸太和之中壹圉範圍之內鄉人士莫不
感勵而歆艷之子覺謂不可無以示來者既勒家則於
碑復徵濂文以紀昔成周之世一夫受田百畝其家衆

為餘夫亦二十五畝賦由斯而出夫由斯而定其勢不
得不分當是時未聞有同居累世者其相親相恤之政
則有大小宗法存焉大宗幹也小宗枝也枝有千萬之
不齊幹終一而已此前王持世之微權也自封建宗法
之制壞九族之親漫不相統屬若秦肥視越瘠仁人義
士乃於服盡情遷之時綴之以食而弗殊事雖異於古
不猶行古之道哉浦江嚴爾之邑以義門聞者三而予
覺又不悖其先而繼焉古禮義之俗豈有越於此哉文

毅公之言益可徵矣子覺名聞之後金華諸族亦同出於鳳林顯者項背相望而淳熙宰相尤著勢隆望重尚不能合族以居而子覺一韋布之士斷然行之可謂賢矣雖然靡不有初鮮克有終子覺之嗣人世守不墜他時將與鄭氏儷美龍光下燭行當煥映於山川之間濂因不辭而記之又繫之以銘銘曰

易著同人合乾與離上參於天火之赫熹類俗辨物君子以之況我宗屬一氣之為譬猶單幹漸敷羣枝服雖

少殺情或甚非物我相形矛盾迭馳借耰取箕諄語紛
披所幸天衷亘古無虧不有人豪務克已私何能大公
拔其藩籬浦陽之江其流瀾瀾太樸未散民淳俗熙以
義聞者接軫聯惟有美王氏裔出紳綏佩厥先訓如銘
鼎彝大合其族嗜德若飴夙夜無訾竭其心思度物引
類取式樹規鉅探浩渺細入密微日約月會有文可稽
耄倪同心一唱百隨孰為範防徵禮與詩以匡念慮以
肅威儀如水斯渚畚築以時涓滴不戒不啻漏卮古云

孝弟致家之肥何間古今驗若龜著維彼崇構肇自築
基既堅既飭棟宇翬飛維彼跬步千里在茲行行不息
至也何疑尚慎旃哉勇毅自持誰謂華高企其咫而太
史造銘勒之豐碑

王府叅軍追封縉雲郡伯胡公神道碑

明宋 濂

皇帝定鼎金陵思得智勇之才用之於是處之胡公仲
淵躍然而起以赴功名之會入陪廟算出鎮鄉邦言聽

計從寵遇無比浙東之俊彥攀龍附鳳者皆自公始公
諱深仲淵其字也系出漢安定宋初諱棟者自慎之丹
陽遷龍泉棟生璠璠生文虎文虎生竦竦生晟晟生滂
滂生衢州錄事叅軍松年松年生鄉貢進士應辰應辰
生樂清令琇琇生江南路兵馬都監見大則公會大父
也大父鏜父鉅仕元為征東行中書省左右司員外郎
母趙氏生三子公其長也繼母季氏生一子員外郎早
歲宦遊京師公始十齡而大母季夫人與母夫人相繼

亡公侍大父與繼母撫幼弟艱難刻厲以自植立未弱冠走京師侍府君適府君使高麗復往候焉府君捐館舍崎嶇萬里奉柩南還舟行泊大崖下夢人語之曰此崖且崩宜急避驚覺趣移舟俄頃大風雨崖崩聲如雷歸葬於縣北之園源廬於墓取諸子百氏天官地志兵謀術數醫學卜筮老釋之書研究之發為文辭操筆立就元季江淮倣擾蔓延浙閩盜由建之浦城松溪入龍泉公嘆曰浙東地盡白禍將及矣乃集鄉兵結寨於胡

山已而處民相聚為盜江浙行中書省調萬戶舒穆魯
宜孫戍處州辟公參謀軍事檄所隸諸縣募壯士為軍
浹日得數千公引之屯竹口下令賊中曰爾皆良民也
因驅迫故為亂棄仗即仍良民矣賊以公長者言不敢
盡毀旗械肉袒請降溫州戍卒韓虎陳安國殺主帥據
城叛行省命宣慰使溫寧布公討之道由處州與公語
意合帥府復辟公參謀之公曰溫城叛者惟一二人耳
若破城玉石俱焚如平民何遣辨士入城說其黨曰韓

虎悖逆亂常今王師四集雖金湯無不破者若輩胡為
作釐粉耶將軍未忍加兵苟能去逆效順悉原宥若稔
惡不悛城破悔無及矣其黨相向泣曰吾屬自度旦暮
鬼耳倘獲復生敢不惟命乃殺韓虎等以城降溫城瀕
海民以漁為業時城閉三月民病甚公請發粟賑之驩
呼之聲載於道路宣慰欲列功聞於朝公辭既而宣慰
以行省叅政總兵征鄱陽復邀公行戎務無巨細悉屬
之青田潘惟賢聚衆為亂龍泉長吏聞風遁去賊焚縣

治公之師王先生毅與門弟集義兵搃退之里中惡少年疾其功害先生公在鄱陽馳歸執害先生者盡殲之縉雲之黃村松陽之白巖遂昌之大社麗水之浮雲泉溪無賴者咸為盜根勢蟠結不可禦行省丞相喀喇公承制以舒穆魯公為行樞密院判官分院鎮處州至則假公分院行軍都事統兵討麗水泉溪賊拔之未幾又平浮雲白巖賊懼來降縉雲盜亦就平乃移師攻遂昌賊酋周天覺方友元傾其精銳出迎公笑曰賊若堅守未

易即殄滅今來豈非天授我乎部分諸校以正陣接戰以奇兵夾擊別遣遊軍入山搜其伏匿賊三面受敵大敗斬首數千級生擒八百人獲方反元梟之乘勝攻大社周天覺降移兵討青田賊賊黨金德安殺潘賢兄弟以降時國兵取浙東婺衢既下獨處州為舒穆魯公所守不降皇帝遣僉樞密院事胡公大海由間道取處州公遂出戰敗北大軍入城分兵取屬邑公以假元帥統龍泉慶元松陽遂昌四縣兵閉關為拒守計四縣士民請

公內附以全民命且曰公治兵十年勤勞至矣而朝廷
無一命之錫君何負於國哉公知時事已去乃出見胡
公上素聞公名召至南京待以殊禮居亡何擢中書左
司員外郎上日與公論天下事公有言未嘗不稱善也
詔公還處州招集舊所部將校以從西征上既平江西
命公以親軍指揮守吉安會浙東苗軍為變婺守將被
害而處城亦為所據上遣公復處州比至城復除公浙
東行省左右司郎中總制處州軍民事郡甫被兵民物

凋瘵而山寇乘間竊發人情未固隨方招捕凡首惡即誅之猶慮戍兵之寡募之獲勝卒萬餘人諭於衆曰兵少不足禦敵師衆又無以食之奈何衆皆曰養兵以衛民苟不為禦備計子女玉帛且不保況於食乎公乃因民之產權宜增賦之沿海軍素驕橫以復城功橫益甚公擇其尤無良者斬之衆乃讐服江西食浙東鹽有司十分稅一販者鮮至公請以二十收一商賈遂通城南枕大溪浮橋廢久隄當水衝為所齧蝕幾盡公即上流

比舟為梁以濟行者州學敝壞講舍僅存用以貯官粟
公撤而新之薦進士吳世昌為郡文學以司教事城中
民廬多為戎士所據公度閒曠之地建營屋數十區使
居之縉雲官田其稅額甚重執里役者恒以私粟代償
公以沒入之田實其數其害乃除諸暨守將謝再興叛
兵犯東陽平章李公文忠擊走之公引兵為援建議以
諸暨為浙東藩障若諸暨不守則衢處不支乃度地去
諸暨六十里竝五指巖築一新城不旬日而成樓櫓濠

柵畢備上聞諸暨叛遣使來議別為城守計至則城已
完上嘆賞不已後浙西將李伯貞大舉入寇兵二十萬
頓城下堅不可攻敗績而去上念立城功以名馬賜之
青田之蘆茨地接閩徼人素獷悍葉仲賢恃其險屢叛
乘我師在外來寇公還軍深入禽其渠魁少壯皆籍為
兵二十年逋誅之盜一旦就平溫州方明善攻平陽公
出偏師破之并復瑞安所侵地而親統軍攻溫州明善
勢蹙與其仲父國珍議納歲幣上詔公還師明善以鹽

若干進貢上命處州易銀以入內藏上怒銀色惡責守
令使償公曰此吾過也守令祿薄何能償乃售龍泉田
以銀九百兩代輸公入覲上欲留公柄用之以邊事未
輯願守外時上即王位乃擢王府叅軍仍總制處州陞
辭上諭曰俟閩浙盡平當進卿中書矣福建陳友定擾
邊公奉命征之取建之浦城而崇安建陽二縣亦下上
賜以所乘駿馬建守將阮德柔兵四萬屯錦江出我師
後公還兵擊之破其寨柵友定大懼帥銳卒亟圍我營

公突陣與決戰馬蹶被執友定得公頗禮遇之公具道
天子神聖四海歸心羣雄樂為之用且引竇融歸漢故
事感之會元使者至遂遇害歲乙巳春也年五十二上
痛悼不已命使者即其家祭之詔中書議加恤典追封
縉雲郡伯有爵而無官階職勲者有司之制未備也公
天資穎拔智識絕倫藝術學之無不精性倜儻好施賢
士貧乏傾橐以周之守鄉郡五載馭衆一以寬厚用兵
十餘年未嘗妄戮一人其歿也聞者莫不流涕鄉人立

祠祀之配項氏生二子長楨宣武將軍處州衛指揮使
司次樞女一適章存厚公歿二年楨等刻木為像具衣
冠葬於園源之左來徵濂文昔濂侍上於白虎殿忽顧
問曰胡深何如人濂對曰文武才也上曰誠如卿言浙
東一障朕方賴之濂辱公交五六春秋見公酒酣耳熱
指揮三軍雄姿不可遏及與縉紳之流論文評詩則歇
然書生也未嘗不服其勇而愛其謙今公不可作矣用
備著公之事揭諸墓門以告後世銘曰

洗洗胡公萬人之英一劍橫空莫之敢撓浙河之東地
氣盡白此為兵徵見於龜筮爾衆荷戈來入我堡寘爾
枕席拔爾水火公師如風寇散如雲一鼓之餘盡為埃
塵節鉞出鎮涉厯五年桴鼓不驚雞犬晏然誰登叛人
陷我諸暨公建新城寇至輒敗皇用嘉錫使車繹絡天
閑龍馬於公弗惜公感主恩酣歌慨慷誓提八閩以歸
職方旄旗所屆勢如破竹天未厭亂三軍夜哭公才孔
多公志弗阿月出如楮公命奈何丈夫之澤流於異方

孰能行之父母之邦匪公之德十里枯魑公雖止斯庶
亦無愧廟堂有嚴肖像其中精靈翕然上與天通括蒼
之山其翠欲滴公名配之有永無斁

風門洞碑

明宋 濂

金華縣東南五十里有山曰風門山下石洞洞之戶可
入二人其內晦人不敢往以石投之有聲礧礧然莫測
其底止風從中出襲人毛髮皆豎鄉民意其必有神歲
時禱祠之多應因號曰風門洞神久而神與人習降於

巫言生四子皆為神民即洞西一里所西溪之原為祠以像神并四子其來已久至正丙午夏旱民走祠下爭昇其像以歸像至之鄉雨隨至否則咫尺不及民益驚不敢慢琴山里浦二處事神尤謹初里浦嘗有神次子像靈甚是歲琴山迎禱之得雨里浦不雨人曰我神也奈何澤琴山而遺我乎遂欲昇去琴山民曰神澤我我未有以報請緩之相待久與之盟曰天雨則以神歸我已而里浦果雨歲以大穰於是琴山之民思報神惠復

刻木為次子別像請邑士王閏碑神之休烈植祠下明年琴山有秋而西溪螟為災西溪民疑新像不利沉像於水而碎其碑是歲西溪大疫死者十七八神降言將盡殛西溪民民惶懼殺牲叩首請為像以贖罪像具碑文已毀琴山士俞慶來言其故請文噫斯事亦異矣然非異也木石之怪久而不散能為災警人況大山穹谷之靈乎其能出雲雨為休民祇奉之亦事之必致耳豈不可哉或與之抗則過矣禮山川能澤物者所在祭之

如茲神者澤民而享其奉非濫也宜也民烏得而不敬乎系之以詩曰

風門之山蔚穹窿羣峰左右翼其宗勢若萬驥環一龍
帝恐地軸膠不通為鑿巨竅貫其胸復驅后祗叱豐隆
手鼓大塊噓雄風至今山竅如截筒有風蓬然出其中
下深不測上無窮幽怪宜為神所宮惟神受命於祝融
身騎赤虬搖綠鬚四子夾馳乘四熊川君水伯扈以從
或珥青蛇持雨鏃或撼鼉鼓或震鋪歛陰倏陽互溟濛

喜則吐雲怒流虹山民駭瞻增敬崇殺牲奠酒陳微衷
願施霈澤回秋豐伐山築祠溪水東彩楹畫棟扉則彤
縣民歲時來會同攜孩扶耄如聚蠶蒲伏裸獻罔不恭
有不恭者殃厥躬神為帝臣秉大公願恢至仁綏九農
聖經國典祠有功效高博施名必鴻鐫辭廟門元碑穹
著祥昭異警羣聳千秋萬祀為神雄

卓忠貞公廟碑

明王 鏊

夫振刷茅靡汎掃風塵杖黃鉞以康帝圖執朱旗而清

人瘼者聖人之略也氣有前往義無反顧五鼎赴而如
歸七族沉而不悔者烈士之勇也故夫王綱解則開八
紘以乂之臣節弛則張四維以維之斯所謂言有正而
若反道有悖而相濟者乎卓忠貞公名敬字維恭溫之
瑞安人也負公卿之骨髮則相表其奇異蹈風雨之迷
途則虎為之嚮道學府多聞披玉軸之文史兵符默契
窮金壇之祕訣陳仲弓閨門之德蔣公琰社稷之器公
實兼之洪武末國制草創儀章未立吳王太子或爭局

於禁中梁國旌旗乃上擬於天子公以夕郎首建朝議
固已晰蒙萌通國體矣高皇帝因大器公晉宗人府經
厯再晉戶部侍郎建文初載燕國始建公睹其幾微密
為計畫語具劉忠愍所為傳中即賈生策諸王之勢晁
錯謀劉氏之安何能遠過而壯士難期老謀莫試尋至
中州圯拆上國奔離士女同嘆於陰墟鬼神共謀於曹
社蓋天步初夷屬搶攘而未定故人懷靡常舍神聖其
奚屬斯時也以高帝之子繼承高帝之緒以高帝之略

龕夷高帝之人新命舊邦非逐鹿之可擬子燕孫謀豈
瞻烏之靡定公即準管魏之擇主撫鐘簴而自怡其與
更二姓事百君者當異日談也顧刀環築口吠堯之語
不輟戟枝入頸送往之情彌厲臧洪同日誓不孤生卞
壺一門幾無噍類豈不痛哉昔伯夷之諫也太公扶而
去之公之死也少師與有力焉非古今之道殊忠佞之
情異也以公材智邁於等夷生死能為有無故也公沒
文皇帝追惜之曰國家養士三十年不負其君惟卓敬

耳湯不以伐夏而欲強沉淵之務光武不以翦商而遂紂
采薇之墨允非天下之至公其疇能與於此嗣後二百
餘禩京兆用今皇帝癸酉詔書建祠冶成山側祀公等
若干人名之曰表忠所為明主恩厲臣節之意甚厚公
生東甌而郡之專祀其魂未妥鄉人興嘆蜀衛侯承芳
來守是邦始即中川文山祠右為祠以祀公於乎方黃
之死事非不烈也而碩畫無聞胡解之委身非不智也
而顯名俛失前有曲突之謀後無銜璧之辱奮一時而

起千祀者其惟公乎予也訪侯郡廡劇談芝桂覩公廟
貌與薦蘋藻靈爽如存嗟人骨之皆朽忠孝勞生悟光
明其何慕潔性爰告卽石為銘祠曰粵古貞臣動必以
正圖國忘死見危授命砥柱中流疾風斯勁峩峩卓公
忠出其性有明開闢地正天刊龍戰甫戢玄黃未乾九
海波沸十嶽峰剜勇智不作華裔疇安真人踵興大命
有托帝緒中賡壇社如昨簞食壺漿稽首崩角命有興
廢人無適莫公也矯矯力抗其衝賈策定制晁疏徙封

委心王室削欵侯宗水投石拒心苦力窮無波不隨有
作莫遂大厦顛隤一木焉制勇嬰鱗逆心安骨碎鼎鑊
胡甘社稷是衛疇不自委曰國懿親公志邁世矢死靡
分心堅百鍊義不二君陵厲白日晦藹高雲周民則頑
殷弊已厚養士州平庶幾無負厥有褒詞皇皇天口君
義臣忠異塗同紐我皇御宇丹書白麻閔彼忠魂一洒
垢瑕旌祠冶城錫引厥家仁風扇動義日光華海嶠甌
鄉公之桑梓祠宇弗虔仰瞻奚以有美衛侯鳩傭相址

高麗雲構層廬電起長江孤嶼楚楚新宮摹文像貌以翼聖功

城鶚頭碑

明侯一元

國家威德達暨四裔為守山海之邑或不備城郭吾樂之先嘗城矣以兩溪之水不時決齧至於槍纍儲胥闕如也中世有警始城後所置兵焉犄角既形內地斯固其外海壖要害之處往往列障戍兵矣顧獨遺鶚頭鶚頭者其山下漸於海深流峭岸無沮洳以難之海有不

靖即鶚頭常先受兵嘉靖乙巳秋賊一夕登岸邑侯歐陽公先事調度伏兵戰大捷事具先君子記中其後賊來他處輒膠沮如斬馘破舟者數矣而終不敢睨鶚頭第逡巡海中則以侯前一戰奪其要路也侯深惟賊尚逋誅遊魂息而民尚無藩籬之限戰勝餘威不足恃也迺復即鶚頭城焉歲丁未某月城成邑人侯一元曰休哉我侯為樂樹百年之固往者賊紛紜時議者多言海防其大者不出三事一曰斂民入保毋令樵漁者為賊

餌禽者為賊間焉二曰召募得賊者與贖鎰金鹵獲以
畀之則人自奮而戰其所乃予推侯之功莫尚於為民
請賑其次自將拒險又其次乃今為城當乙巳之歲大
江以南連省大侵吾樂窶人之家羣行搏食法寢不行
而有司請賑不得鄰境之糴交閉民安逃死乎由是閭
閻日蹙賊衆日滋邑里之情必為賊得何獨樵漁者之
咎乎侯時下車未久洞悉斯害若沃焦金迺挺身獨爭
監司得粟數千石各以區區賦民民始全活來糴勸分

小大悉定士之病者稍任負戈乃始料揀習之於戎故
曰用兵之道要在附民假令侯奉職自全畏於失上則
必不能得粟百里之內人人自搖誰與制敵矣故吾以
為侯之上功兵久不用紈袴日媮乎時旋抽之節亶為
容觀急則固其城如壘石焉惻然無為民援之心侯援
所鼓桴乃市子弟耳無不手戟而戰者若何嘗敵侯乃
躬率之海上止於兵衝戰艦咫尺軍聲相聞侯堅卧有
條侯之膽身犯矢石有安平攻敵之志用是人人氣決

不戰自倍然後香餌重賞可得而用矣故侯自將之以奮士捷矣侯又不恃戰而城是營是乃古昔修攘所貴王道所以全也且守之道百於攻以全力守四裔寇盜坐而斃耳南仲朔方小范大順是其效也世之仕者當身為務去不復顧以故一切為媮以侯累勝之威可數歲無事來年且報政行矣迺方厲士乘城為百千世計嗟乎仁人之心豈不遠哉蓋善理人者如理身輕徭省賦不賜而民給中戶自裕貧下不迫振其克災為民蓋

藏元氣厚矣懸賞厲法三軍為一用財則若流刈姦則
若草譬藥瞑眩厥疾瘳矣疾病已除元氣已復補苴罅
漏謹邪所自毋令復來六氣之沴遠矣故數勝而亡者
元氣薄也仁義而弱者藥不審也先笑而後號咷者少
愈累之嗟乎夫治豈不艱哉侯謂予曰盍碑諸以諗來
者毋俾城壞予惟漢營平有云兵事當為後法乃不嫌
自伐其功予所以道侯終始縷縷者亦欲後之君子鏡
於先難增修其故非以為侯夸無庸匿諱爾侯名震字

某西蜀人

會稽典史吳侯生祠碑

明徐渭

會稽典史吳侯成器徽之休寧人其始仕會稽當海上
寇初入內地侯以能將兵知名於是承大吏命提兵守
水陸阨塞厯浙東西南直隸與賊大小數十戰斬賊首
數百級生獲數十人奪還被虜者以百計凡戰之處休
止督發設守出鬪有方法禁士卒無毫毛擾居人又能
舍死先士卒民多其功往往就所戰處建祠刻石今曹

娥江其一也父老某等來告厥成請予序事予感而嘆
曰曹娥一弱女子耳常其伊嚶婉孌乃不知有門外事
至其赴父之難眇大江蹈洪濤慷慨激烈有猛丈夫之
所不敢為者夫典史下僚也動為人所籍倬然何異一
女子至其當國艱難乃惟知曰吾臣而已仗劍舍身以
當事乃不復知有他計此其人皆以忠孝植性歷千萬
古而同道今其祠若廟岐然兩相望豈偶然哉詩曰
伊昔孝娥垂璣紃珥當斯之時一女子耳憤江痛父不

得屍所披髮亂流娥猛逾虎今之仕者沈伏下僚儼然
長嘆則怨其遭有寇在庭孰敢攘臂咸將棄戈何況邑
尉桓桓吳公天植忠孝先國後身與娥一道啟宇崇功
娥江之北祠木相望照映江水

季先生祠堂碑

明徐渭

先生蚤聞新建致良知之旨既懼後之學者日流而入
於虛也乃著書數百萬言大都精考索務實踐以究新
建未發之緒四方之士從遊者數百自筮仕至老且革

無日不孳孳學問其卓然以繼絕學覺來者為已任而處心制行光明夷坦蓋卜諸鬼神鬼神信之質諸兒童兒童信之者矣間有疑者謂先生當長沙時以嚴以涅為人所彈詆罷而獨居禪林著禮書將有所迎而希也嗟乎先生先人秉憲為大夫家世祿先生知長沙為太府罷歸不兩紀身死幾不能殮骨未寒而三子已寄舍於他人矣涅者固如是乎火烈民畏故鮮死萑苻盡殺子太叔之不猛也芟稂莠植嘉禾何病於嚴哉當長沙

之覲善當軸者以書畀先生先生疑其薦已也懷之不達及罷啟書果然始推官建寧會寧藩變先生提兵壁分水關院史以鄉試役檄府長及先生先生移書并綰長令城再三拒院檄勿往即得罪勿顧為御史得謫則以慈壽太后及肅皇帝兩宮故批逆鱗即此三事其志不在榮進也審矣拂之於顯然之章奏而顧迎且希於不可必達之故紙迎且希者固如是乎先生之學與行仕與處其美不可殫述大約為人所疑與信則如此噫

一疑之一信之彼從其疑我從其信亦足稱賢矣乃不
得與概無可信者一食於鄉之賢殆十有二年先生存
時往往語其徒曰吾子孫無顯者而顯者之先吾所知
也吾死慎勿隨世俗為鄉賢舉聞者志之常怏怏一日
越中薦紳暨家大人以先生即不樂於校未必不樂於
社祀於社吾輩力所易為也議始倡和者響應都穎上
言遂撤已所居旁舍四楹徙置禹跡寺西林實先生舊
著書所以祠先生陳按察鵠胡通參朝臣奔走督率助

貲者衆祠旬日告成門以二重垣徑畧備潔牲卜吉治
主以升鼓吹道周國人喜躍以某職史也宜書某始見
先生時未知學也既稍從事於學而先生已歿歿而嘗
追師之竊比於聶兵部事新建之義於是舉也誠快之
書其敢辭考之古功德與言立有一焉則祀於國而今
先生居其二昌黎曰鄉先生釣於某水游於某樹某立
其可指而樂者有三則宜祭於社而今先生獨苦於學
其三可指而樂者未嘗居一顧不即祀於國而亟祀於

社也於法雖有遺亦從我之信以俟夫疑者之久而自信云爾於是謹書其舉事始終之歲月與鳩工之人祠始於萬厯二年二月之朔越十五日而成又五日而主以入鳩工者為里人王煉先生名本字明德別號彭山以進士仕推官召拜御史謫歷縣佐長起為禮部郎中再謫歷府佐止長沙知府助貲者例得書於碑之陰為作歌曰

修篁兮叢枝黃熊子兮招提湘潭兮牧長解佩組兮言

歸依短寮兮長席載六籍兮以卑栖髡管毫兮杵杵惟
以遺兮將來淹日月之逾幾靈冉冉其何之祠靈兮享
靈非他人兮吾儕靈之來兮總總挽北斗兮乘箕中參
差兮延佇勞騁望兮何如

國朝

東甌王廟碑

朱彝尊

豪傑之士往往起破家亡國之餘流離瑣尾極人
情所不堪卒自奮於當世論者徒矜其勲伐之隆

至心跡之微隱而不彰者多矣張良之於韓田橫
之於齊卒從諸侯滅秦要其志期於報讐雪恥而
已若夫封留王齊豈以是為榮哉予讀史至秦楚
之際有感東海王之事其報讐雪恥無異良橫之
所為而終王其故土守越之宗祀以不廢則又良
與橫銜悲飲恨而不能致者王克致之可不謂難
焉惜未有推明其心者而僅以趙佗梅鋗之屬視
之也歲在癸卯予游永嘉乃得謁王之廟於縣治

之東華蓋山之下廟久不治言之知縣事漢陽王
君世顯修葺之王君許諾以予之將歸也先事請
予文紀之石按史王勾踐之後國覆於楚至秦郡
縣天下廢為君長及諸侯畔秦王率越從鄱君入
關滅秦漢擊楚王率越佐漢滅楚高帝封王於越
以奉越後惠帝二年舉高帝時越功曰閩君搖功
多其民便附乃立為東海王都東甌世俗號東甌
王廟之所由名也漢制非劉氏不王其初異姓

王者八國卒就誅滅王與長沙王芮閩越王無諸
獨終始得全非以忠謹然與司馬遷謂王入關時
項籍主命弗王故王不附楚是亦未推王之心者
蓋王之國楚實覆之項氏雖非楚後而世為楚將
安知覆越王之非項氏也然則王之不附楚而佐
漢也明矣方其喪國於楚廢於秦版圖入丞相府
越人終保而不散以瘡痍未起之衆馳數千里犯
強虎狼秦及漢軍垓下黥布信越期會不進而王

之用命若蹈湯火蓋國恥未雪王之心有不忍一
日懷安者是可謂豪傑之士矣夫其流離瑣尾英
毅果銳之氣百折而不回歿為明神廟食於千載
宜也爰從王君之請綴以詩俾迎神送神者得以
歌焉辭曰

芒芒禹迹無遠弗届兮維此東甌九牧外兮夫餘
封越少康之支兮至於勾踐遂霸江淮兮鼂與不
壽世載更兮翁翳之侯及無疆兮師覆於今其亡

忽兮或君或長海濱是窟兮七世維王既訕乃伸
兮地雖秦郡人越人兮函關既入拯羸酷兮復會
於垓殲楚族兮國恥既雪白馬刑兮敬鬼而壽百
六十齡兮維甌之鄉王所涖兮秩祀孔虔民有事
兮何以迎之尊有壘兮枇杷橘栗桃李梅兮維王
來樹兩旗兮何以送之工用謳兮琴瑟笙竽筑坎
侯兮維王之去亦莫我尤兮我歌唱兮我舞洋洋
兮黍稷維馨邊豆大房兮千秋萬歲俾樂康兮

寧海將軍固山貝子王保台遺愛碑

葉臣遇

皇帝御宇之十二年奄有中外悉主悉臣幅幘普徧章亥
所弗能步乃偃武修文諸藩鎮例解兵柄而三孽
于以方苞明年甲寅耿精忠叛于閩六月賊帥曾
養性攻溫州八月率賊將朱飛熊水陸卜餘萬陷
黃巖進薄台郡是時變起倉卒逆焰方張外邑山
僻土賊又乘機蜂起四出剽掠孤城危岌勢且不

支十有一月

寧海將軍固山貝子自錢塘飛渡來援經年底定再造台疆億萬生民之命實始之終之備極撫綏全活之恩所謂起一州死人而骨肉之也方賊兵雲集居民紛紛驚竄守者閉門禁阻而逃者日益衆民出遇賊皆脅令割辦賞死及遇官軍又以其黨賊悉擒戮民進退皆無生理益鳥獸散城旦夕且下遂有議棄台退保寧紹者貝子至即力排衆

議決計堅守且謂糧餉匱乏人無固志皆撫御經
理之不善耳乃下令弛門禁聽民得出入樵蘇其
被賊脅從割辦者許自投歸槩置不問又令軍中
毋取民寸草寸木犯必律以軍法於是大兵數十
萬衆肅然奉令民慶更生商販蜩集軍食無乏士
氣倍增而賊薄城下隔江干為陣築長圍以困我
晝夜矢石不絕 貝子親督將士悉力拒守凡濬
濠築固樹柵設伏一切機宜皆先事豫籌賊計無

所出攻稍懈乃突出精銳擊之賊屢敗去賊間諜
楊御雲邱文挺楊士麟輩潛廝軍中窺我虛實

貝子察其有異令巡道楊公偵得之盡獲其與賊
往還私書偽札立磔于市賊氣益沮仙居在郡西
北為右臂接壤天台先為賊據時侵天邑斷我師
寧紹餉道 貝子謂恢復之計當自仙邑始乃陽

治浮橋與賊會戰陰遣勁兵攻茅坪遂復仙居取
梁蓬出賊後賊腹背受攻遂大潰 貝子親率大

衆轉戰而前所向披靡旋復黃巖太平方克仙居
時諸將以城不蚤降例以子女充給有功 貝子
惻然憫之弟恐不賞則無以示勸乃下令聽民取
贖各歸其家民大感悅歡聲雷動歌之曰 王之
仁仁莫加昔無室今有家軍行輜車糧糗需役甚
繁有請拘執行旅充役者 貝子曰商賈甫通若
復擾之是沮其來意吾寧稍緩輸運決不重困吾
氓也行旅聞之莫不感泣先是溪口大芬各鄉居

民為賊所迫多以芻糧助之諸將執法請勦貝子曰此民也而忍戕之乎地近賊巢不得已為自全計耳豈誠背叛者耶且吾奉

命討賊惟仰體

朝廷好生之德以不殺弘濟鉅業耳其悉宥之全活者不啻數萬人台民蒙貝子不殺之恩類如此貝子豁達好謀知人善任駐台一年紀律嚴明恩威並著與士卒同甘苦偶糧不繼口啖粗糲一

餐終日不飽裨將某為流矢中目鏃不能出乃親
至榻前慰問再三繼之流涕以故士皆感激樂為
効死此所以我台以皮骨僅存之殘黎竟獲保全
安如磐石也 貝子之恩之德為覆載於我台也
無窮今之畊于野安於室居於肆販於塗絃歌於
塾熙熙皞皞何一非 貝子拔之水火而登之衽
席者台人感 貝子王之賜即感 貝子王所以
廣

朝廷好生之賜迴憶爾時烽烟四警孤城陷危寄微
生於鋒鏑乞身命於須臾耄耋髣髴無不惴惴欲
絕則今日之市井依然骨肉無恙誠非台民夢寐
所及又豈台民意念所及哉王之思澤瀝心莫
報累襁難酬僉議建祠報恩而俎豆之又恐事遠
年湮王之豐功盛德後世或不及知於是節其
大要以壽諸麗牲之石俾與大固靈江共傳不朽

云

寧海將軍固山貝子王撫嶧功績碑

闔邑士民

自來聖世揆文奮武莫不有勲戚重臣共相夾輔
以成久安長治之休而其恩澤之垂奕世謳思而
不能收要皆出於民心之誠然非強而致也粵稽
康熙甲寅閩逆倡亂草竊乘機風鶴之驚徧金衢
溫台諸郡嶧邑一彈丸地重山複嶂尤易藏奸賊
首金國蘭胡雙奇等糾黨數千人剽掠殆無寧日
守兵單弱不能制邑之危如累卵矣惟時我貝子

王寧海將軍仗鉞徂征道經剡水謂叅將滿公
進貴知府許公弘勲曰小醜不除將為肘腋患乃
留勁卒一千授方畧令協力攻勦不數月而克逆
蕩平烽烟頓熄非將軍決勝算於帷幄之中曷
克俾吾儕食舊德服先疇得以敦詩書而安隴畝
乎夫甘棠僅召伯之所憩猶繫念於南邦矧其去
水火而衽席起死亡而肉白骨者而忍忘之哉謹
拜手為之頌曰將軍篤生呈瑞應期派衍宗潢

盟在帶礪在昔甲寅藩逆窺伺一時羣醜乘機肆
恣而我乘邑蒙難急遽鋒火宵驚望切雲雨幸命
靖海涖台經此日擊猖獗赫焉怒起謂不蚤除後
將難制用探虛實并度形勢分寄虎旅密授奇計
鷹武奮揚捷彼螳臂立奏膚功克俾安乂厚澤深
恩久而弗替風和鹿嶠波澄剡溪爰勒貞珉永垂
奕禩

墓誌銘

沖素處士張公墓誌銘

宋 呂祖謙

勅號沖素處士張公澤予先人同筆硯友也既沒之明年其子廷玉乃以宣慰司王世文所記之狀踵予乞銘余閱狀為之嘆曰今之文章德行有如處士者乎處士之生既有徽號以表於前又有著述以貽於後行將百世而師之矣奚俟余之誦誦為雖然高山仰止非伊朝夕謹叙次而銘之處士諱志行字公澤八行先生州里之所通稱沖素處士朝宁之所旌號也祖逋翁諱德馨

助國賑民褒賜冠帶旌奉議郎廣惠先生父退翁諱撫
歷資政學士處士幼入右庠言動不苟禮度不愆見者
莫不敬而慕之居常閉戶讀書默誦六經融洽書史期
得聖賢意旨之所在為文揮毫立就追配古人慨然以
天下為己任就殿試纚纚數萬言直陳時政得失當時
執政者深疾之遂自遵晦力學砥行務為大儒歸隱東
陽士子多從學焉日惟以文賦自娛曩倫為樂優游乎
禮義之場涵咏乎詩書之圃師徒問答若將終身本分

之外不加豪末嗣乃建祠堂於托塘崇根本也闢終慕
堂於公山敦孝思也立書院以延末學置義田以惠宗
姻設勸節田以勵風俗見饑疫死者即市棺而葬之遇
病不能興者悉皆資而助之殆數十百人懿德美行不
能悉載一日遊富春山抗志長吟流連竟日若與嚴子陵
有默契焉遂拂袖歸謝絕世事木石與居涵碧山白雲
塢天宮寺其別墅也時浙東宣慰使朱異薦於朝與崇
安劉勉之同時被召徵書前後凡三至不就賜號沖素

處士所著有易傳撮要四卷涉史略二卷覆瓿集饒紙
翁傳謝賜號表辭舉八行詩東陽十勸等歌皆有裨於
名教者處士生於元符己卯八月初九日卒於淳熙乙
未十一月十九日歷年七十有七卜葬於本里張公山
去宅西北一里兩峴拱於左右一水繞於東西土厚林
深益佳地也嗟乎先王之行高矣而其人已往予先人
亦往悲哉其人其事不可無述予親見而表傳之以俟
後之聞而知之者故為之銘銘曰

粹然之行奕然之文三辭徵辟天子不臣嘉遇林泉富
貴浮雲窮理樂道絕類羣操堅冰石德達穹窿先正
典型昭代儒宗遺祠翼翼流水淙淙範模百世高節清
風

許白雲先生墓誌銘

元黃潛

先生諱謙字益之姓許氏其先占籍京兆之興平後有
官於吳者因家焉九世祖延壽宋刑部尚書六世祖實
元豐間居笠澤又徙婺金華縣曾祖諱經國祖諱應龍

考韓觥淳祐丁未進士官宣教郎主管三省樞密院架閣文字無子以從父兄貢士日宣次子嗣即先生也先生天姿高嶷甫能言貢士夫人陶氏授以孝經論語入耳即不忘五歲就學莊重如成人宋亡家毀貢士君相繼淪沒僑居城闉借書讀之雖疾恙不廢開門授徒有所疑無從質聞仁山金先生講道蘭江委已而學焉金先生曰士為學如五味之和醯鹽既加則酸醎頓異子來見我已三月而猶夫人也豈吾之學無以感發於子

耶先生聞之惕然而所居相距遠會金先生設教於呂
成公祠下乃便於叅叩金先生告之曰吾孺之學理一
而分殊理不患於不一所難者分殊耳先生由是致其
辨於分之殊而要其歸於理之一又曰聖人之道中而
已由是事事求夫中而用之金先生歿先生益肆充闡
多所自得謂吾非有過人惟為學之功無間斷耳制行
甚嚴而應世不膠於古不流於俗介而不驕通而不隨
身在草萊而心存當世大德十一年歲在丁未熒惑入

南斗先生以為災在吳越深憂之是歲大祲貌加瘠或
問曰先生豈食不足耶曰今道殣相望吾能獨飽耶東
憲府聞先生名辟以為掾避弗就肅政廉訪使劉公庭
直舉茂材異等副使趙公宏偉舉遺逸亦皆固辭趙公
在南臺命除舍館迎致先生使衆僚多士有所矜式欣
然為之起而不久留也東還倦於應接入華山中學者
翕然贏糧笥書而從再歲以兄子喪而歸戶屨尤多遠
而齊魯幽冀近而荆揚吳越皆百舍重趂而至先生之

教以五性人倫為本以開明心術變化氣質為先以為
已為立心之要以分辨義利為處事之制至誠諄悉內
外殫盡常曰已或有知使人亦知之豈不快哉或有所
問難而辭不能自達則為之體其所欲言而解其惑討
論講貫終日無倦攝其麓疎入於密微聞者方傾耳聽
受而其出愈真切情者作之銳者抑之拘者開之放者
約之為學者師垂四十年著錄千餘卷人隨其材分咸
有所得達官富人之子望閭而驕氣自消踐庭而禮容

必飭四方之士以不及門為恥縉紳先生至於是邦必
即其家而存問焉或訪以典禮政事先生觀其會通而
為之折衷聞者無不厭服臺省諸公若王公士熙耿公
煥王公克敬鄭公允中李公端吳公燾趙公天綱陳公
思謙趙公仲仁前後列其行義於中朝鄉闈主司曹集
賢鑑楊翰林剛中亦率同院刻上其名於省闈郡復以
遺逸應詔先生終不為動重紀至元之元年屬當大比
諉先生以衡文亦莫之能致也常謂吾非必於隱惟其

時耳講授之餘齋居凝然一日瞑目坐堂上門人弗知也徑入聞其無人乎先生之側拱立久之先生顧而曰爾在斯耶習於靜定久而安焉可知也先生以羈孤不逮事架閣公及夫人而事陶夫人盡子職兄璟性剛委曲承順怡怡如也時氏姊有子而貧無以為養迎歸奉之終身鍾愛二子而教飭有方冠婚喪祭賓客之禮必盡其情文既老而益艱瘁僦屋以居田不足具饘粥處之裕如門人呂權蔣元金涓方為先生買田築室而先

生逝矣先生素多疾金先生疾革徒步往省會大雪中寒濕及弁兄璟喪於廣信疾增劇不良於行疾少間而神更清茂三年冬十月疾復作謂其子元曰伯兄以是月二十三日卒我殆與之同乎及是日正衣冠而坐戒元以孝母友弟元復請所欲言曰吾平日訓爾多矣至此復何言門人朱震亨進曰先生視稍偏矣先生更肅容端視頃之微瞑遂卒年六十八妻朱氏承直卽廣德路總管府推官天與之女子男二人長元次亨以為兄

憬後葬縣西北婆女鄉安期里交友赴者若干人門人以義制服合衆布營葬事因所自號而表曰白雲先生許公之墓明年學者相率上狀郡府祠先生於學宮僉肅政廉訪司事杜公秉彝建議請贈官賜諡未報先生於書無不觀窮探聖微期於必得雖殘文美語皆不敢忽有不可通不敢強於先儒之說有所未安亦不敢苟同四書章句集註有叢說二十卷數繹義理惟務平實每戒學者曰士之為學當以聖賢為準的至於進脩利

鈍則視己之力量何如然必得聖人之心而後可學聖人之事舍書何以得其心乎聖賢之心盡在四書四書之義備於朱子顧其言辭約意廣讀者或得其粗而不能悉其義或以一偏之致自異而初不知未離其範圍彼世之詆訾貿亂務為新奇者其弊正坐此耳始焉三四讀自以為瞭然已而不能無惑久若有得覺所言初不與己異愈久而所得愈深與己意合者亦大異於初矣童而習之白首而不知其要領者何限其可以易心

求之哉讀詩集傳有名物鈔八卷正其音釋考其名物
度數以補先儒之所未備仍存其逸義旁採遠搜而以
已意終之讀書集傳有叢說六卷時有與蔡氏不合者
春秋三傳有溫故管窺若干卷以春秋大義數十百條
與友人張君樞極論之皆傳註所未發於三禮則叅伍
考訂求聖人制作之意以翼成朱子之說語學者必順
天地之理酌古今之宜使通於上下皆可遵用又嘗句
讀九經儀禮三傳而於宏綱要旨錯簡衍文悉別以鉛

黃朱墨意有所明則表見之其後友人吳君師道得呂成公檢儀禮視先生所定不同者十有三條而巳有老儒自以為善言易力詆程子先生與之反覆辯論辭詳義正老儒語塞乃謝曰不意子之於易若是其精也中年以還仰觀俯察益有見於陰陽往來升降消長闔闢之故謂伏羲之經廣大悉備文王周公孔子之辭乃其傳註六爻之義特發凡舉例耳諸儒於象辭變占各有攸尚要不可舉此而廢彼也然先生獨未有所論述豈

以孔子晚始言易孟子深於易而不言易乎觀史有治
忽幾微若干卷倣史家年經國緯之法起大皞氏訖宋
元祐元年秋九月尚書左僕射司馬光卒以為光卒則
宋不可復興誠一代理亂之幾故附於續經而書孔子
卒之義以致其意也書成以示張君樞言運作之延促
豈必推天命有人事焉漢儒言災異皆欲近脩人事上
答天譴況聖賢之培植基本祈天永命者哉先生於天
文地理典章制度食貨刑法字學音韻醫經數術靡不

該貫一事一物苟可為博學多識之助者必謹志之至於釋老之言亦皆洞究其蘊為學者孰不曰闢異端苟不深探其本而識其所以然能辨其同異別其是非也幾希有三傳義例皆藁立而未完諸生有日聞雜記未及詮次藏於家有詩文若干卷有自省編畫之所為夜必書之金先生所著論語孟子考證資治通鑑前編皆未遑刊定垂歿以屬之先生今二書得大備而行世先生力也昔何文定公得朱子之傳於其高弟文肅黃公

而文憲王公於文定則師友之金先生學於文憲三先生皆婺人先生出於三先生之鄉而克任其承傳之重程子之道得朱子而復明朱子之道至先生而益尊先生之功大矣先生葬已十年元以張君樞之狀俾潛為之銘潛無所知識何能形容有道氣象重惟先生交游凋謝而潛獨後死不得辭敢取狀所述而為之銘銘曰

道學之傳天下為公婺之先儒獨得其宗鉅人迭興踵武相接逮於先生綿綿四葉先生之學能自得師實踐

之功出乎真知萬殊之間無微不析一本之同會歸有
極酬酢萬變必用其中涵養本原以敬始終茲際休明
力扶正學聞風而來固間南朔春陽時雨隨地發生洪
纖高下咸仰曲成迪惟前人學有師法克生後賢規重
矩疊先生有作彌大而昌師嚴道尊於昔有光先生之
身斯道所寄視其安否以為隆替天胡不憖不訖耄期
山頽木壞人將疇依不亡者存遺書孔有文不在茲尚
啟爾後

傳

鄭氏義門事蹟傳

元陳繹曾

鄭文嗣字紹卿婺州浦江人也五世祖綺有學行宋建炎初合族以居綺生聞聞生運運生政政生德珪德珪生文嗣歷二百年咸如初至大二年秋九月鄉老黃汝霖等言文嗣六從同居縣長呼都克婁實克上其事部使者加審察焉文達中書吏部四年春二月准式旌表門閭文嗣生鑑鑑生渭渭生挺皆善守合二百餘口無異

心者後至元元年冬十有二月太常博士柳貫與鄉校羣士又上狀請如故事復其家從之初文嗣既沒從弟太和司家事嚴而有恩雖家庭中凜如公府子弟小有過頌白者猶鞭之每遇歲時大和坐堂上羣從子皆盛衣冠雁行立左序下以次進拜跪奉觴上壽畢皆肅容拱手自右趨出足武相銜無敢叅差者見者喑喑嗟嘆謂有三代遺風雖石畬家亦有所不及名聞天下自大丞相至臺院諸顯公賦詩多之大和喜學禮不奉浮屠

神經像冠婚喪祭必稽古乃行子孫從化馴行孝謹不
識塵市戲嬉事執親喪哀戚甚至三年不御酒肉食貨
田賦之屬各有所司無敢私凡出納雖絲毫事咸有文
可覆挾日則會不公則監視發之諸子晝趨功入夜輒
聚坐一堂溫溫笑語至更餘始休諸婦但事女紅不豫
家政宗族里閭以恩懷之各有差內外極嚴輿臺通傳
不敢越堂限有家規行於世

論曰智勇功名有志者或能就之至於會衆族而共財

則非世有其人不能以久考之歷代史自漢及今僅數十人焉可謂難也已外藩列其行朝廷旌表其門夫豈獨愛一人哉將仕左郎翰林國史院編修官吳興陳繹曾撰

抱甕子傳

明宗 濂

予嘗游括之少微山俯瞰四周如列屏障山之趾有隨地形高下為蔬圃約二十畝傍列桃杏梨李時春氣方殷蔬苗怒長滿望皆翡翠色樹亦作紅白花繽紛間錯

如張錦繡段心訝之以為是必有異曳杖冉冉至其處
氣象幽窈絕不聞雞犬聲遙望草廬一區隱約出竹林
間疑中有隱者亟前候之良久見一士戴椶葉冠被紫
褐裘抱甕出汲水灌畦進問曰夫子何名曰山澤之民
無名也強之曰人以吾抱甕遂呼為抱甕子耳曰丈夫
處世亦多術出則華軒結駟入則鐘鳴鼎食夫子營營
逐逐於一甕間無乃自苦乎抱甕子赧然一笑指苔磴
揖予坐竄甕於地答曰吾軀與人同豈不樂榮貴與顧

念之頗熟矣百歲之間寧復有幾與其強情而徇世不
若任真以自放吾園之西則九盤山巔宋州廨建焉側
有烟雨樓當山雲初興景象萬態極可玩李鄴侯馬莊
敏公嘗登之而感慨矣其東清溪秦觀賢良謫官而來
游憩其上時坐鸞花亭賦詩而今安在哉非惟人隨流
水異日凌霄崇構皆蕩為氛埃一凝竚間野草荒烟若
愁思之不可禁世事往往類此何足深道吾所以抱甕
而弗辭也且當抱甕時嗒然忘形志慮外絕精神內營

目不見色耳不聞聲招之弗前麾之不驚委蛇容裔而
萬物莫吾敢撓自以為無愧於赫胥尊盧之民子以吾
為逐逐營營不亦過與曰然則灌畦亦有道與曰有蔬
性不欲燥燥則生意厄而不伸蔬性宜濕濕或過焉則
氣傷而寢屈吾日夜調之變之俾適夫厥中則茫然而
秀嫋然而榮言訖抱甕而去予味其言蓋有道而隱者
也任真自放不幾於樂其天歟人物代謝一俯仰間不
幾於達人大觀與心與耳目之官內而弗外不幾於守

一不二與藝疏得中不倚於一偏不幾於治民有政歟
疾起而追之抱甕子入竹陰間閉戶高臥扣之不應若
無聞者予憮然而退

西郭生傳

明 貝 瓊

西郭生姓陳氏其先括蒼人五世祖宗少師退菴主秀
之崇德簿崇德地四平無山俗質而尚文退菴樂之遂
卜縣西之南津居焉至子清毅公開府益大其門清毅
公性剛介累官至尚書通歷六部既老穆陵為書清節

高風四字褒之表其閭曰清節里元季清節里第毀於
兵後築月城其上生奉父螺室先生辟地於外者十年
既而歸結廬月城西謝客讀書受業者恒數十人螺室
已歿生無仕意或曰以爾之才盍乘風雲翔天衢與時
相頡頏顧摧氣局志枯槁田畝中無乃左乎應之曰猩
斃於醪蠅溺於汁昧於所戒也吾可據非所據禍其身
以及宗如猩蠅為小夫孺子所笑耶日營滌澣上給八
十之母取遺書以教子使不辱吾先志願足矣聞者高

之

萬氏一義後傳

明周起莘

女子萬義顓字祖心浙江鄞人聰慧能書常書孝經列女傳而有烈丈夫行以心乎祖而尚義故曰義顓曰祖心義顓祖明威將軍以忠死父鍾襲寧波衛指揮母曹太孺人兄曰武嫂張孺人弟曰文婦吳孺人相繼嗣父文即鄞人所祠為射龍將軍者也將軍常哨桂門禦倭乘夜坐樓船遙望見兩炬如鐵鐔光射海水漸近將軍

意為倭艦引大黃射之應弦落其一炬忽龍躍翻海水
數千里將軍即與龍鬪力不敵樓船盡覆死之蓋炬則
龍睛也後為神乘潮上下精響常見土人因祠之自明
威將軍至射龍將軍三世四忠三節義頗時盛年嘗通
媒氏慎擇耦未嫁弟射龍死吳孺人有遺腹痛祖父兄
弟為國事俱死遂私禱曰願得男然猶未與媒氏絕母
曹太孺人在堂泣謂曰汝祖從高皇帝起兵後北征力
戰歿於陣汝父死遜國之難汝兄從征交趾死弟又射

龍死爾萬氏將無後矣嫂張孺人婦吳孺人泣謂曰姑
年老闕甘旨汝兄弟又俱死即得男艱育奈何義頗笑
謂曰無憂吳孺人免身果得男名曰全迺喟然起曰吾
家三世死國事者四人俱不得以馬革裹寸骨還今吾
母老而二嫠婦主家俱年少所遺孤在乳下微宗血脉
之係在此一兒吾若行則復失一臂矣且吾以一女子
畢身不字事幾何古人曰立孤難吾強為其難者於是
遂與媒氏絕不通而家人亦思藉其力亦不勸日夜同

撫全兼治家親機絞營立門戶全未十歲遂嗣父官自
明威將軍至射龍將軍祖孫父子兄弟三世俱未及三
十歲死曹太孺人張孺人吳孺人俱年高卒義顓逾七
十歲乃卒義顓幼能書手書先世諸戰功及死事示全
使勉力忠孝更使習古兵法輒詢得當喜稍不合怒為
之不食全長跪謝過乃已由是全感激更為名將自明
威將軍至射龍將軍三世墓俱葬冠劍曰冠劍墓子孫
對冠劍祀之獨祀義顓與射龍將軍列坐祀亦不絕

浙江通志卷二百六十六